

Tayta Diosman yarakur imano kawanansipaq kashqanpis

Wakin runakuna Tayta Diosman yarakuyashqanta nirpis manami musyayansu runa imano kawayananpaq kashqanta. Sayta yachakunansipaq Tayta Diosman yarakur runata ruédaman tinkusishun.

Chawpin: Jesucristuta chaskikushun

Tayta Diosman yarakuq runaqa Jesucristutami chaskikun.

Ruëda chawpincho cübu y ëji mana kaptin manami tumayta kamäpakunsu. Saynölami Jesucristuta mana chaskikurqa Tayta Diosman yarakuyta kamäpakunsisu. Payta chaskikurmi isanqa payman yarakunansipaq mushuq kawayta chaskinsi.

2 Corintios 5.17

Pipis Jesucristucho karqa mushuq kamash runanami kaykan. Unay kawayqa päshashnami. Kananqa lapanpis mushuqnam kaykan.

Gálatas 2.20

Noqaqa Jesucristuwan cruzcho wanushnömi kaykä. Manami noqanasu kawä, saypa trukanqa Jesucristumi noqacho kawan. Saymi Tayta Diospa Surinman yarakur kawaykä. Paymi kuyamashpansi noqansi rayku wanurqan.

Äru: Dios munashqanno kawashun

Tayta Diosman yarakuq runaqa pay munashqannömi kawan.

Jesucristuta chaskikush karqa paypa makinchönami kaykansi. Saymi yarpachakunsi ima rurashqansipis, parlashqansipis y yarpashqansipis pay munashqanno kananpaq.

Santiago 2.14

Kuyay wawqi panikuna, “Tayta Diosmanmi yarakuykä” nirpis pay munashqanno mana kawashqaqa ¿imapaqtaq yarakushqansipis välin? Sayno kawaq runakunataqa Tayta Dios manami salvanqasu.

Chusku räyukuna

Ruëdacho räyü mana kaptinqa ëji mayjina jirururpis manami ruëdata tumasintsu. Tayta Diosman yarakuq runa cäsukur kawanapaq chuskumi räyukuna kaykan.

- Ishkay räyumi kaykan Tayta Dioswan kawanansipaq.
- Ishkay räyunami kaykan runa mayinsiwan kawanansipaq.

Räyü 1: Palabranta yachakushun

Tayta Diosman yarakuq runaqa paypa palabranti yachakun.

Tayta Diosmi palabrancho tantiyasimansi pay pi kashqanta y imano kawanansipaq kashqanta. Saymi palabranta mana yachakur musyansisu imano payta cäsukuransipaq kashqanta.

2 Timoteo 3.16

Tayta Diospa palabrancho lapan qelqaraykaqkunaqa Tayta Diospa yarpaynikunami kaykan. Saymi ali kaykan yachasinansipaq, tantiyasinsipaq, coriginansipaq y Tayta Dios munashqanno kawanansipaqpis.

Räyü 2: Tayta Diosta manakushun

Tayta Diosman yarakuq runaqa paytami manakun.

Tayta Diosta manakurmi imata yarpashqansitapis wilapansi. Saynöpis alabansi, perdonta manakunsi, agradëcikusni y wakintapis yanapänanpaq ruwakunsi.

Efesios 6.18

Imay hörapis Espiritu Santu tantiyasiyashushqaykino Tayta Diosta manakuyay. Mana ajayaypa imaypisi ruwakuyay. Yarakuq mayikikunapaqpis mana qonqaypa manakuyay.

Filipenses 4.6–7

Imapaqpis ama lakikäriytsu. Tsaypa trukanqa Tayta Diosta agradëcukur lapanchöpisi yanapashunaykipaq manakäriy. Tsayno manakäriptikimi Tayta Dios ali kawayta qoshunki. Paymi shonquykitapis yarpaynikitapis cuidanqa Jesucristuman yarakur mana lakikärinaykipaq. Tsaymi imanir kushishqa kawashqaykita pipis mana tantiyanqatsü.



Räyü 3: Shuntakëshun

Tayta Diosman yarakuq runaqa yarakuq mayinkunawanmi shuntakan.

Yantata ninapita jorqush upishqannömi noqansipis yarakuq mayinsikunawan mana shuntakar qajakashno rikakunsi. Shuntakarmi isanqa shumaq yarakunansipaq shakyäsinakunsi.

Hebreos 10.24–25

Kuyanakunansipaq y alikunata ruranansipaq jukninsi jukninsi shakyäsinakushun. Wakin wawqi panikuna shuntakayta qelanäyaptinpi noqansipa ama qelanëshunsu. Jesucristo kutimunanpaqna kashqanta musyaykarqa shakyäsinakunansipaq imaypisi shuntakëshun.

Räyü 4: Wilakushun

Tayta Diosman yarakuq runaqa Diospa wilakuyninta runa mayinta wilapanmi.

Tayta Diosman yarakurqa runa mayinsita wilapansi paykunapis Jesucristuta chaskikuyänanpaq. Chaskikur kushikup-tin noqansipis kushikusni y Tayta Diosman masmi yarakunsi.

Romanos 1.16

Noqa manami penqaküsü Tayta Diospa ali wilakuyninta wilakur. Say wilakuyqa Tayta Diospa podeminmi kaykan lapan chaskikuqkunata salvananpaq.